

## **Obrazloženje pojedinih odredbi zakona**

U daljem tekstu daje se obrazloženje na odredbe ovog Zakona, u dijelu koji se odnosi na eventualni prijenos javnih ovlasti na Vanjskotrgovinsku komoru Bosne i Hercegovine, kao i osnov za navedeno.

### **Član 3. Nacrta Zakona o izmjenama i dopunama Zakona o međunarodnom i međuentitetskom cestovnom prijevozu:**

Vanjskotrgovinska komora Bosne i Hercegovine, kao asocijacija privrednih subjekata u okviru zakonskih nadležnosti obavlja i poslove javnih ovlaštenja, te doprinosi razvoju i unapređenju transporta i komunikacija, te bi, shodno navedenim izmjenama Zakona, Komora pružala kvalitetnu podršku svojim članovima iz oblasti prijevoza putnika i roba.

Također, ovakvo rješenje je primjenjeno u Republici Sloveniji – nadležnost za izdavanje licenci imaju Obrtno – poduzetnička zbornica Slovenije i Gospodarska zbornica Slovenije, na osnovu Zakona o prevozih v cestnem prometu, a što je usklađeno sa: Uredbom (EZ) br. 1071/2009 Europskog parlamenta i Vijeća, Uredbom (EZ) br. 1072/2009 Europskog parlamenta i Vijeća i Uredbom (EZ) br. 1073/2009 Europskog parlamenta i Vijeća.

### **Član 3a. Nacrta Zakona o izmjenama i dopunama Zakona o međunarodnom i međuentitetskom cestovnom prijevozu:**

Ovakvo rješenje postoji u Republici Hrvatskoj, gdje je stručno osposobljavanje u nadležnosti Hrvatske gospodarske komore i Hrvatske obrtničke komore, koje su ovaj postupak fizički približile korisnicima odabirom velikog broja lokacija u Republici Hrvatskoj za njegovu realizaciju. Postupak u ovoj oblasti, koji vode gore navedene komore u Republici Hrvatskoj, moguće je, primjenom predloženog rješenja unaprijediti i učiniti efikasnijim i transparentnijim, uz daleko manje izdatke koje trenutno imaju prijevoznici po ovom osnovu.

### **Član 11., 15. i 16. Nacrta Zakona o izmjenama i dopunama Zakona o međunarodnom i međuentitetskom cestovnom prijevozu:**

Ovakvo rješenje je primjenjeno u Republici Hrvatskoj - na osnovu Zakona o prijevozu u cestovnom prometu Republike Hrvatske, članom 3. stav 3. Pravilnika o dozvolama za obavljanje linijskog prijevoza putnika, postupak usklađivanja prijedloga međunarodnih i međuzupanijskih redova vožnje provodi Hrvatska gospodarska komora.

Također, ovakvo rješenje je primjenjeno u Crnoj Gori - na osnovu čl. 46. i 64. Zakona o prevozu u drumskom saobraćaju Crne Gore, postupak usklađivanja prijedloga međunarodnih i međugradskih prijedloga redova vožnje provodi Privredna komora Crne Gore.

-----

Ovdje napominjemo i da je Skupština Udruženja prijevoznika u međunarodnom i međuentitetskom cestovnom prijevozu putnika, na sjednici održanoj 21.04.2013. godine, razmatrajući aktuelno stanje i problematiku u djelatnosti međunarodnog i međuentitetskog cestovnog prijevoza putnika, utvrdila određene aktivnosti i mjere, te, između ostaloga, usvojila sljedeće zaključke i preporuke:

- Da se pokrene procedura za donošenje novog Zakona o međunarodnom i međuentitetskom cestovnom prijevozu, koji treba da uvažava potrebe domaćih prijevoznika i bude usaglašen sa EU direktivama iz oblasti cestovnog prijevoza;

- Da se pokrene procedura za izmjene i dopune Pravilnika o uvjetima i postupku izdavanja licenci i kvalifikacijskih kartica vozača za obavljanje međunarodnog cestovnog prijevoza, kojim će se jasno definisati uslovi i postupak licenciranja prijevoznika, a izdavanje licenci za vozila i kvalifikacijskih kartica vozača usaglasi sa pozitivnim zakonskim propisima koji se primjenjuju u državama okruženja i Evropskoj zajednici;
- Da se pokrene procedura za prijenos javnih ovlaštenja usaglašavanja i registracije redova vožnje međunarodnih i međuentitetskih linija i izdavanja knjiga putnih listova za međunarodni vanlinijski cestovni prijevoz putnika, sa Ministarstva komunikacija i transporta Bosne i Hercegovine na Vanjskotrgovinsku komoru Bosne i Hercegovine.

Naprijed navedeni Zaključci i preporuke su potvrđeni i na sjednici Odbora Udruženja prijevoznika u međunarodnom i međuentitetskom cestovnom prijevozu putnika Vanjskotrgovinske komore Bosne i Hercegovine, održanoj dana 11.01.2018. godine.

Također, Odbor Udruženja prijevoznika u međunarodnom i međuentitetskom cestovnom prijevozu putnika Vanjskotrgovinske komore Bosne i Hercegovine je, na svojoj 21. sjednici održanoj dana 22.6.2018. godine, ponovo podržao prijenos gore predloženih javnih ovlasti sa Ministarstva komunikacija i transporta Bosne i Hercegovine na Vanjskotrgovinsku komoru Bosne i Hercegovine.

Predložene izmjene pojedinih zakonskih odredbi, koje se odnose na oblast prijevoza tereta, jasno su definirane u Zaključku Odbora udruženja međunarodnih cestovnih prijevoznika tereta, sa vanredne, elektronske/telefonske sjednice. Ova sjednica je održana po Zaključku Skupštine Udruženja međunarodnih cestovnih prijevoznika tereta, u kojem su navedene pojedine oblasti koje moraju biti obuhvaćene ili jasnije precizirane izmjenama ovog Zakona, te naloženo Odboru Udruženja da, u najkraćem roku, sačini prijedlog izmjena i dopuna Zakona i isti proslijedi na dalje postupanje.

U svom prijedlogu, Odbor Udruženja je definisao da je stručno osposobljavanje, provođenje ispita i izdavanje potvrda o stručnoj osposobljenosti, kao i izdavanje kvalifikacijskih kartica vozača u nadležnosti Vanjskotrgovinske komore Bosne i Hercegovine, koja poslove osposobljavanja realizira u suradnji sa komorama entiteta i Brčko Distrikta BiH, u skladu sa EU standardima.

Pored toga, Odbor Udruženja je definisao da visinu naknada u oblasti stručnog osposobljavanja, koje su prihod Vanjskotrgovinske komore Bosne i Hercegovine, utvrđuje Vijeće ministara BiH, na prijedlog Vanjskotrgovinske komore BiH.